



UNIVERSITÄTS-  
BIBLIOTHEK  
PADERBORN

**Cor Deo Devotum Jesu Pacifici Salomonis Thronus Regius,  
Seu Meditatiunculae Exquisitissimæ**

**Luzvic, Étienne**

**Coloniæ, 1729**

Paræneticum.

---

[urn:nbn:de:hbz:466:1-60085](https://nbn-resolving.org/urn:nbn:de:hbz:466:1-60085)



## Paræneticum.

*Præbe fili mi Cor tuum mihi. Prov. 23.*

**I**N omni creatura, quæ sub Sole vanita-  
tibus mundanis occupatur; nihil huma-  
no Corde sublimius, nihil nobilius, nihil  
Deo similius reperitur: quapropter nihil  
aliud quaerit à te, nisi Cor tuum.

Sapienter hoc quispiam monuit: sed  
quotulquisque est, qui audiat, JESUQUE  
Sponso cordatè petenti Cor donet suum.

---

Audi popule stulte, qui non habes Cor.

Jerem. 5.

**T**uum Cor ambit Christus, & sibi poscit;  
Quin & cruoris emptitat gravi librâ:  
Pretium recusas, nundinator infamis,  
Mavisque captent stygius Auctionator,  
Caro, atque Mundus pro triente vix una,  
Mordebis unguem postea, & caput scalpes,  
Scelus heu probrosum! nempe Cor habet Christus:  
At tu Cor ullum non habes, homo vecors.

C. M. è S. J.

† †

DE-





*Devotis JESU Corculis sacrum.*

**C**OR vocis defero, cara *JESU* corcula, saucium, & æstuans amore sed divino : *Thronus* hic est *Regius* sponsi vestri *pacifici Salomonis*; sanctuarium, in quo jure sacrificium peragi Deus voluit; arx, quam *Jesus* ipse contra vim hostilem tutandam suscepit, occupatam, sacrilegeque profanatam recuperat, & eluit; expiatam verò sibi optat, consecratque pro palatio, templo tribunali : hic scilicet *Jesus* imperia exercet sua, hic regnat, hic erudit, hic appellationum morâ recisa, aut prædestinationis, aut æternæ reprobationis sententiam pronunciat : hic tonitrua, hic fulgura concitat, hic luminis radios in sublunari globo spectari minimè consuetos, blandè ejaculatur : denique Cor offero Cœlum & Curiam supremi animarum, rerumque omnium Moderatoris, at quorsum ego id vobis potissimum ? existimavi sanè nusquam alibi aut majori in pretio, aut  
 pro



*Devotis ꝛ Esu Corculis Sacrum.*

pro beneficio cumulatiore munus hocce  
meum, quàm apud vos collocatum iri,  
quos probè nossem non modò ad res isti-  
usmodi diviniore apprimè factos, & exer-  
citatos: sed iisdem præterea tam ardentè  
affici: ut pluris unius *Jesus* amores æstimare  
soleatis, quàm omnem Regum Principum-  
que favorem ac gratiam: quippe in vestris  
animis altiùs profundiusque fixa est *Christi*  
*Cruce*, Sanctæque Paupertatis Studium,  
quàm honorum fungi, opum quisquiliæ,  
Avorum ceræ, ac fumosæ imagines, cætera-  
que bona, quæ quidem ita vulgò vocantur,  
& quæ vestræ sortis, ac familiæ homines aut  
sibi facile pollicentur, aut aucupantur am-  
bitiosius.

Brevem adfero tabellam, in qua tamen  
(dicam modestè) totius Christianæ perfe-  
ctionis summam exiguis meditatiuncula-  
rum punctis delineavi vestri profectò, cæte-  
rorumque causâ, qui idem vobiscum sen-  
tiunt & amant.

Porro in eam divini amoris imaginem  
etsi rudi penicillo deformatam statim atque  
oculos defixeritis; recognoscetis, opinor  
pul-



*Devotis ꝛ Esu Corculis Sacrum.*

pulcherrimarum virtutum, quas in animis vestris efformastis, repræsentatam effigiem; simulque deprehendetis quibus vis, quibusve gradibus divina Bonitas vos deduxerit in montis istud fastigium, ex quo licet adhuc humi constituti cœlum jam ipsum, promissam illam terram, beatamque filiorum Dei hæreditatem contemplemini, & in quo habetis non oculis modò: sed etiam pedibus subjectam atque calcatam infœlicis Ægypti, Babylonisque, id est, confusionum parentis, longè calamitosissimam regionem. Ita igitur accipite, *dilectæ cœlo mentes*, hoc qualecumque donum, non tam attentæ ad manum, quàm ad cor donantis.

Ego quidem intendo digitum, ut ita loquar, in favos mellis, qui hic Expositionibus quibusdam tamquam cera obvoluti latent; sed Spiritus sanctus, uti fore confido, purum mel, atque adeo ipsos nectaris fontes aperiet, animosque vestros ad plenum divinarum gratiarum imbribus beabit. Ita medullitus aveo, voveoque.

*Vester humillimus, obsequientissimusque  
in Christo servus.*

STEPHANUS LUZVIC.